



Opuscula



Opuscula



LEO

SIGNUM COELESTE,

In Firmamento Seraphicæ Religionis

à Patre Luminum

ACCENSUS,

*Quem ingrediens*

Sol Iustitiæ Sacris inflammavit radijs,

DOCTOR SANCTISSIMUS

BONAVENTURA,

S. R. E. CARDINALIS,

ARCHIEPISCOPVS ALBANENSIS,

Ad Annuam Festivæ Lucis Revolutionem,

In Basilica S. FRANCISCI Conventus FFr. Min. Cracoviæ,

A Devotissima tanto Sideri Vrania,

Erectis debitæ Sanctorum Cultui pietatis & affectûs

Parapegmatis

OBSERVATUS,

Et à

M. NICOLAO OCHOCKI,

In Alma Universitate Studij Generalis Cracoviensis Phil. Doctore & Professore

Scholæ S. ANNÆ Seniore,

STYLO ORATORIO

DEMONSTRATUS.

Anno Leonis de Tribu Juda super Terram Victoris, 1703.

Pridie Iduum Julij.

---

CRACOVIAE,

Ex Officina Francisci Cezary, S. R. M. Illustriss. ac Rndiss. Dñi Episc. Cracovæ  
Ducis Severiæ; necnon Scholarū Novoduorscianarū Ordinarij Typogr.



Stat ferri acies Mucrone corrusco. Stricta.

*Virgil. 2. Æneid.*

Sole laceſſita & lucem ſub nubila jaçtat.

*Idem 7. Æneid.*



Clarior quanto micat Orbe pleno,  
Cum ſuos ignes cõeunte Cornu  
Iungit, & curru properante per nox  
Exerit vultus rubicunda Phœbe.

*Seneca in Hippolitum.*

Pura nec obtuſis per Cœlum Cornibus ibit.

*Virgil. 1. Georg.*

Phœbeæ lampadis inſtar.

*Idem 3. Æneid.*



Illustri ac Magnifico Domino,  
D. CASIMIRO IOANNI  
OCHOCKI,  
PATRUO DIGNISSIMO,

ac

MECÆNATI AMPLISSIMO.



*D*ivinâ Augusti Majestate Leonis Seraphici laudibus  
Sacrum modicum hoc ingenij opus tantò audentiùs  
lucem publicam adspexit, quantò majori Tuæ Mu-  
nimine gratiæ potentiùs primâ facie Gentilitijs præ-  
cedentibus Armis, nihil adversum infestumq; sibi oc-  
currere formidat, Magnifice Domine. Licet enim Sacris Emi-  
nentissimo Fulgoribus Astro, devoto illius observantissima Cultu allabo-  
raverit mea Umbratilis Urania, exindèq; luce maximâ circumfundi vi-  
detur, & favore Numinis propitio elevati ad supera alta studio ani-  
mi,



mi, quum inter tot Lumina obversetur Coelestia. Satis ideo collustrata  
desuper prodit in oculos cunctorum, avidius, lucida quaeq; spectantium  
& quod securior umbram Terreni Livoris evadat. Satis Leo defensor  
Tutela ministrat: nihilominus ut spectatissima magis everberet lyn-  
ceas animorum pupillas, & publici Argum judicij, acuens lumina recte  
sibi intendere faciat, geminatis à Nativi Luminis Fonte splendoribus  
Tuis circumdari, & augeri poscit. Nihil equidem convenientius du-  
xit, quam luce signatum aetherea id omne, quid & quantumcunq; illud  
munere Deum in brevem mortali facundia apothecum Signi meliore  
Polo radiantis proferre licuit, Magno Nomini Tuo dicare, & quid-  
quid lucidum hic cernitur, in obsequij gloriam Cultu officioso impende-  
re. Nec licuit aliter mihi, & spes Tuas, & mei partes officij ac-  
curatius implere, nisi hoc, quod Communio Sanguinis jubet, contendam  
Venerationis literariae munus debitum, Honori Tuo deferre. Ita omnem  
qua in me Tuus fertur affectus, propensionem dignatione hac praemia-  
re è voto gratitudinis, & amplius Tuae patrociniū gratiae mereri,  
simulq; parva huic Opellae decus & pretium comparare videor. Ergo  
Tuis sub auspicijs prodiens, gratiam cunctorum in oculis inveniat, exi-  
lis apparatus eloquij laudibus Doctoris SS. Caelo tenus assurgens eluce-  
at, adauctus majori luminis incremento. Fave huic in sinum Tuae  
gratiae reclinis umbræ, Sacrae lucis Comiti, quam Lux Sacra Leonis spar-  
sit super terra, tanta visibilem magnitudine, quantam pagina haec ca-  
pere suffecerat. Quam dum placido gratus animo recipis, me cepto fa-  
vore & patrocinio fove, intimi magnitudine affectus Tibi devinctis-  
simum,

Qui sum


Nominis & Honoris Tui

Observantissimus  
ex Fratre Nepos,

M. N. O. Ph. Doct. & P. S. S. S. A.



# ORATIO.



Principem Animalium, quem super Colosseo ignota mole spectandum Amphitheatro, æstifera dono naturæ misit Lybia, non solo tantum sustentari, ast etiam fulgidâ non absimilis imagine formæ, celso radiare Polo, Superni Spectator Attonitus prodigij, eatenus mirari non desinit Orbis AA. Equidem illi Sapientum vetustissimi, quibus quantumvis Cœli regione remotis, superas ascendere domos, menteq; Deos adire licuit, plus quàm humano sublimem evecti in axem ingenio, cum tacitis labentium cursibus astrorum continuos obitus specularentur & ortus, undiquaq; sparsorum confusam luminum multitudinem, ordine miro signatam, numero determinatam, multiformi distinxere Ectipo, adinstar viventium cum Stellaris vocamen dedere. Hinc Arcturum, Hyadas, Geminosq; Triones, Oleniæ Sydera Capræ, & Ariadneæ Cœlestia dixere dona Coronæ. Quod verò maximi intererat, viam Solis duodenis placuit definire Signis, quibus non sine mysterio convenientia, cum Animatis imposuere Nomina, etiam Nemæos quondam pavorem Herculeum Leones, inter æthereas Animalium effigies, lucentesq; Signorum flammæ locavere. Enimverò cum ita liberè oberrat per convexa Polorum, celsaq; scrutatur phænomena curiosior pupilla, protinus major rerum supernarum admiratio, in sublime eluctatum superirruit animum, ingentem rapit in stuporem, unaq; omnes hoc in loco Ter Maximo Numini Sacro præsentis commovet. AA. Nimirum aliud, quod nos sacrationi circumvolvitur ambitu Cœlum, tantò visibili præstantius, quantò ab eo remotius Superis viciniùs assurgit, & mortalem fugit aspectum, à Patre luminum accensis fulgidum ignibus, Seraphicæ Religionis Firmamentum. Aulam hanc ætheream tot ardentibus Stellarum agminibus, quot lucidis Sanctorum imaginibus decoram admiratus, simulac umbræ terrenæ gravata pondere lumina, fursùm iterato attollens, adamantinis infixæ Orbibus, diù immota tenerem curam anxius, obnixo corde premerem, quidnam superno Divina luserit potentia miraculo? Arcanum tandem supremæ favore propitio intelligentiæ edoceor ultra spem, votumq; cunctantis vox ab alto levi nubium delata murmure, allabitur talia personans auribus: *Qui autem docti fuerint, fulgebunt quasi splendor firmamenti, & qui ad justitiam erudiunt multos, quasi stellæ in perpetuas æternitates.* Divino percitus Oraculo, tantò celerius fervidiori sciendi in sublime fertur animus desiderio, quantò vehementius tollitur novæ rei prodigio, quam etiam Cœli Seraphici teneat partem Doctor SS. BONAVENTURA, tunc maximus quærendo labor, fatigabit fortassè vel ipsi Siracusij Senis speculatorem oculum, minimè exnunc, cuncta qui luce majori supereminet celsior astra, quantum mortali attingere fas est pupillæ, illabitur lumine Sacro, fixus Polo Seraphico, intra Orbitam Solis Iustitiæ,

B

motu



motu regulari perpetuus, totus undiquaq; Sidereâ fulgidus Imagine, stupen-  
teq; naturâ, tantam Metamorphosim, non hominis amplius figuram, quàm  
terris mortalis vixit amictus præferre, sed ignei Leonis stellatam indutus  
formam, lucidumq; decorem gestare, sui pars fulgentissima Cœli, aureo con-  
signata Sidere, omnibus visibilis apparet.

Ergo qualis quantusq; à tot Sæculis Orbe suo mobilis Ascetica Dioptri-  
ce, à rerum Cœlestium Scientissimis observatus, talis tantusq; mihi munere  
Divûm è voto devoti animi, ad suæ lucis annuam Revolutionem publico fe-  
stivæ laudis indice & parapegmatis, quæ Sanctior Vrania cultûs honorisq;  
Divorum, Studiosissima sui commodavit spectantibus monstrandus, totâ vo-  
ce atq; spiritu Suadæ Vniversalis dicendus venit Doctor SS. Hic est à proxi-  
mis Solis Iustitiæ flammis accensus Divinis, super Firmamento Seraphico BO-  
NAVENTVRA, Leo Signum Cœleste. Cæterum immenso tuæ percellor lu-  
mine gloriæ, quantumvis ex obliquo tantum umbratilis Tui Spectator, Beata  
Seraphici Portio Cœli. Quidnam de Te Summo loquar Doctore? quò plus de-  
sidero, minus reperio, verborumq; copiâ laborans deficio, quia tamen quod-  
dam simile hominum in Te advertere licet, ab humanis laudibus id alie-  
num esse non debet, ideòq; patiare in luce Sanctitatis Tuæ splendidissima re-  
verentis, adorantisquè mortalis facundiæ umbram, quam Tuæ radio gratiæ  
firma, in Tuas assurgentem laudes erige votis supplicibus precor. Pusilli te-  
nuem umbram Eloquij, Supernæ lucis Comitem, firmitati suæ innixam, vestræ  
summa claritas Sapientiæ tollat ex adverso, & juvet altum surgere, benequè  
terminari in Culminanti Leone.

Stellantis arduus vertex Olympi vasto complexus ambitu, Sector æqui-  
dialis obliquus, volvat inexhausto motu aurea mundo Sidera, hominum di-  
versos variantia casus, antecedentes Principem astrorum, & subsequentes,  
perpetuo deferat gyro Signorum flammis ardentes, eidem axem Polosq; non  
absimilis Zoophorus, sanctiori Signorum Divino lumine fulgentium distinctus  
ordine, superexcelso Seraphicæ Religionis firmamento decurrere advertitur.  
Quòd si etenim gens prisca mortalium altâ mentis indagine in æthereos ire  
sueta meatus, lapsuræ pondera terræ, rapido Cœlorum credidit fulciri rotatû,  
ideòq; adamantinum illud lucidi Firmamenti robur, circumquaq; supposuisse  
Deos censuit, & quò fortiùs tam grandis compages stabiliretur, explicato  
medium ejus cinxisse Zodiaco, ut immensitatem inferiorum, vitamq; Or-  
bis superior mobilis servaret immobilem, teneretquè claudendo perennem.  
Quidni maxime verum clariori documento liquet, quia Supremus rerum O-  
pifex, in medio aquarum multarum, scil. in circuitu tot gentium, nationum,  
populorumq; novum Seraphicis ignibus ardens suscitavit, ac terris immani  
scelerum pondere nutantibus, ne ruerent subduxit Firmamentum, cujus al-  
titudini summæ etiam lucidum superimpofuit Signiferum, quo firmitatis suæ  
robur staret æternum, quo mobili portentosa centrum gravitatis immobile  
salvaret. Nempè Seraphici lucida fascia Cœli sublimi renidet arcu, Divini

femi-



semita fulgoris medio, cuius purpureum fœvit pergere iter terrarum, Superumq; Parens Ter Maximus in lucem, qui Sæcula fundit super hac Orbita, magnum gratiarum circumvolvitur annum, vultuq; placido terris affulget serenissimus, ipsiusve supremo parere nata imperio novo radiantia Polo gratius astra nitent. Firmamentum hoc gaudet, eundem decurrere super Signifero gratiosissimum Phœbum, qui in lucido Empyreï circuitu Cœli, sua irradiat Signa, idem Fons lucis immensæ, unus sufficit omnibus, ubiq; præsens, universa complexus, sacro ejus accensa lumine defert obvia Signa Divorū sedibus æmula, attollens mystica culmina Seraphicæ Religionis. Quæ si erit non nemo Astrorum peritus, hoc supermedio Cœli, quo Phœbus revehitur Orbe, ubinam aurato fulgeat Vellere Nepheleus portitor Helles, & huic adversus undè surgat Tyriæ, per undas vector Europæ, num utrisq; succedant gemini Tyndaridæ, timidis opem ferre soliti navibus, cæteraq; consequentia Signa, quonam hîc vertantur ordine? Sed absit Sacris profana miscere, cedat Orthodoxo Divorum Cultui errorum inventrix Gentilium superstitio, cum suis abjecta Deastris, quos falsa mortalium opinio in Cœlos retulit, perennibus astrorum flammis insignivit, altaq; Numina vano Divinitatis mendacio dixit. Hic qua stellatis cingitur nexibus Seraphicus æther, Sacrationa præcedit astra illud Animal innocens, à DEO in victimam electum, cui nomen ab ara venit, Caput primumq; Signiferi principium, à quo tulit omne punctum, caputq; regulariter moveri, quâ suâ patet circumferentiâ, Seraphicæ Religionis Firmamentum. Agnus inquam ille mitissimus, omnis centrum humilitatis, qui nunc altum præradiat, factus major omnibus, qui semper minor videri solebat, clarissima lux Minorum. Conformis huic, lumine, motuq; pariter mansuetudine Agnus, fortitudine Leo, in Cœlum Seraphicum translatus, primis Solis Iustitiæ succensus ignibus, Divinior Theumesius ardet Sanctissimus Doctor BONAVENTURA, & quia nemo Cœlestis, nemo Divinus in terris, nisi prius vitam agens mortalem, gesserit immortalia, nisi Cœlo digna fecerit, merueritq; inter astra referri. Ipse namq; Iupiter altum quod possideat Cœlum, est aliquod meriti spatium, Doctor Sanctissimus totâ vitâ dignum se Cœlo, dignum alto love probavit, heroâq; virtute evectus, ad magni tecta Tonantis Phæbiq; iter permensus, stetit arce supremâ, jamq; micantibus collucet Stellaris, totus flammeus Leo, Signum Cæleste, & ne meo tantum iudicio talis appareat, qualem dicere fas est rerum magnitudine gestarum vita sua laudabilis, quâ fortissimus Leo probatur, fidem publicam evincit, testemq; Orbis Conscientiam appellat.

Magnanimus rationabilium hic Rex Animalium, maximè humano intellectu pollens, in terris nasci debuit, quò probaretur, fortior majorq; emereret, positus inter sua maiestate minora, non aliter, ut Stella surgens ab imo Horizontis conspicitur, & quò speciosiori formâ visendus, in lucem prodiret communem, locus, insigne cui Regiæ nomen dedere Balneæ, illi nascendi forte contigit Superna ad Regiam Solis Iustitiæ destinato Leoni, ut vigil præ foribus



ribus oculis excubaret apertis: Non in horridi antro deserti, Atlanteisque  
præruptis hunc Leonem foveri existimes, sed ad Hesperij imas radices Olym-  
pi, cujus vertice summo innixa supereminet omnes celsissima Petra, super  
qua ædificavit sibi Sapientia domum Increata. Leo hic ad supera alta evoca-  
tus, terrenas diu non sustinuit auras, quibus sibi nimium noxijs affectus lan-  
guere, ac ultimis viribus deficere cepit, nec aliter pristina restituitur sani-  
tati, donec omne robur suum ministerio Summi Deorum in altis litare  
voverit. Nimirum, ad sublimia natus, infima hæc non potuit incolere, ut viles  
solent animæ, sed generosa indole, heroicoq; animo præstans, eniti usq; ad  
summum ejusdem culmen Olympi debuit. Nec moram patitur, igneo vigo-  
re fervidus tendit in ardua, per quævis obstantia ruit audentior, ac tandem  
excurrit in celsum ætherei montis fastigium. Quem protinus advertens San-  
ctior Apollo, Venator Divinus, amor impatiens, sua tela formosum vitare Le-  
onem, illū directis configit jaculis, ictuq; cor vulneratū igneo protinus inflam-  
mat, jamq; totum enorientem mundo Leonem in superam æternū beatēq;  
viventium regionem transferre parat. Novum super terram stupuit attonitus  
Orbis, felix, quando hæc Numinis præda animata nobiliore spiritu dulci fau-  
cia vulnere revixit. Magnis in sublime processit passibus, decus, honorem-  
que æthereum ut assumeret, qui illum immersis eripientem sese obtutibus cir-  
cumstare, ultrò citròq; visus ambire.

Atq; ut decrevit antè, statuitq; æterna Deū hominumq; potestas, fu-  
turis poscentibus meritis, æstimataq; virtutis pretio, ipso facto renovans mi-  
rabilia, Leonem hunc in lucidum novā metamorphosi transmutat Astrum.

*Munus habe Cælum, Cælo spectabere Sidus.*

Hinc protinus laxatur Machina Cœli, spontè rutilæ pateſcunt fores, rectam  
citaris ignibus rumpentes viam, suorum densiores Orbium partes undiquaq;  
concurrunt agmine multo,

*Invitantq; novum Sidus, pendentq; vicissim,*

*Quas partes velit ille sequi, quibus esse Sodalis*

*Dignetur Stellis.*

Sed ipse Stelliferi Maximus Rector Olympi, fulgido luminum super Orbe Mi-  
norum Leonem, sacris Divini amoris succensum ignibus, posuit axe novo mo-  
bile Seraphici Signum Zodiaci BONAVENTVRAM. Opus hoc admirabile  
excelsi, quod Secula cuncta stupebunt, illicò votis & gratijs, coronârunt gau-  
dentes Superi, ac per cuncta Sideri novo faventes consentesvè dedere mani-  
bus lilia, plenis super aridam mortalium sparsere puniceos imbres. Officio-  
sæ ergo lætitiæ plausibus, totus insonuit æther, & sudo venêre nova gaudia  
Cœlo. Doctâ sonorus pennâ, nubesq; transcendens Magnus ille Tonantis  
Ales in Cœlo Seraphico fixus, aureâ luce Scientiarum, novo præfulsit astro,  
viamq; signavit usq; ad summum. Ingenuo fervore callens mactè secutus  
Leo, in quo Divini vis ingenij, & capacitas summa enituere, festinabat ma-  
ture, finitoreque surgens ab occiduo, postquam Orbe suo decurreret Olym-  
piadem,



piadem, inchoaretq; sequentem, culmen attigit primum Parisino supermeri-  
diano, stetit in auge altissimæ cognitionis, totiq; mundo Divinæ humanæq;  
Sapientiæ lumine clarissimus, Doctor SS. refulsit. Indubitatâ fide tenetur au-  
gusto quodam velamine, tectâ immensæ lucis abyssus, Divinæ jubar Sapien-  
tiæ super terræ faciem explicuisse, quando æternum in Exedris Verbum  
ore humano locutum, ipsius exemplo tanti Discipulus, Imitatorq; Magistri,  
Orbem sui Doctoratûs laureato passu emerit, Gymnasiarcha Leo, alia pro-  
ximiora sibi Cœlestia Corpora, copioso doctrinæ lumine collustravit abunde.  
Doctor Cœlestis librum explicuit Sententiarum, ac tandem ter revolutus axe,  
in puncto Coronam laboris absolvit. Nimirum cum supernis familiarius a-  
gens intelligentijs, quidni factus Sol animorum intelligentissimus, ob subli-  
mitatem mentium supergressus, quam Cœlo tenus exporrectam illimitati radio  
eloquij, altius extulit usq; super æthera. Nempe loquuntur etiam Sidera, ac  
perorant, sed luminis Oraculo, quod non in oculos, sed in mentium pupillas  
descendit. Ad invisam his, qui in evanida rerum temporalium luce apricari  
gaudent, noctis religiosæ umbram sibi conterminam, usq; adeo majori cla-  
ritate refulsit, ut Summi Luminum Patris arbitrio, voto concordi, & desiderio  
Cœli Indigetum Seraphici eligeretur, inter ignes Princeps flamma minores.

Præivit ad Divini nutum Imperij, obedientissimus Ductor, Siderum Leo,  
prodijtque in speculum & exemplar Sanctitatis ac Innocentiæ, assumens no-  
vam ab assisitrice Sedium Supernarum gratiam & fortitudinem, diffuso  
in immensum splendore, eliminabit id omne, quidquid in Stellis obscurum  
ac tenebrosum Lynces terreni adverterent Tanti Muneris spectatissimam  
altitudinem continuatis, sublimium gradibus tantisper superabat, donec eni-  
teretur in auge summæ perfectionis. Verticalem nunquam satis demirari  
potuit Narbona, quemadmodum ille specioso præradians lumine ponè se-  
quentiû agmen Stellarû æthereû regulariter pergere iter docuit, rectaq; tendere  
motu perfectissimo in Orbem æternæ beatitudinis monstravit. Ideoq; ad præ-  
cedentis illius Phænomenon lucidum Agni, qui primo inchoatum, claudit ul-  
timo, Signiferum puncto Seraphicum direxit, porrexitq; cursus astrorum, ne  
fixa toto errarent Cœlo. Verum quantò celsior, tantò minor apparere capit,  
ac inter cuncta minimus astra contendit haberi, ut potè qui tantus videri no-  
luit, quantus esse meruit, radios ideò condere in admissam intimiûs umbram  
debuit, omneq; lumen non ad ostentationem exerere solitus, sed publicis, to-  
tius Stellati ulibus commodare Orbis. Ita, cum ad medium eluctaretur matu-  
ro passu culmen Olympi Leo ecce vigil, nitido eidem patefecit ab Ortus pur-  
pureas fores, & plena rosarum atria. consurgens aurora Solis Iustitiæ antesi-  
gnana, & Parens SS. denuncians, Fontem æterni luminis proximè imminere  
Leoni, hîc protinûs ingentem devoti affectûs concepit ferventi pectore flam-  
mam, erga salutiferum Phosphorum, suaq; rursûs contendenti lumina, festi-  
nans occurrere properat, Sacrumq; Divinioris Matutæ fulgoribus aureum ju-  
bar advertit.

Haussit Divæ tantus fervor dilectionis, studiumq; devoti obsequij, ideò  
ultrò citròq; eidem approximata, ut Musis suevit, amica semper haberi, ita



Cœlestium Alumne Musarum, & Custodi intima, sui Honoris centrum immaculati in purissimo corde Leonis posuit, Diviniq; Deam amoris quidni in Leone manere decuit, nam hæc proximè venturi Solis Iustitiæ Tantæ Majestati par Soliū fulcitare debuit. Et jam subsequens Auroram Serenissimæ Imperator Siderū, qui nuper aureo Vellere Sidus corruscū, medium cūm ascenderet Orbem, visitaret, atq; geminatum æthereo lumine lucem transiens, in summo tandem Altissimus egit Solstitium Tropico Cœli Seraphici. Convertitur ad obvium sibi Zodiaci Signum Leonem, quem vix primo pulsavit radio, exnunc tan- toperè Sacris ignibus inflammavit, ut maximos quos transmissos reciperet, vix sustinens æstus, totum incaluisse Orbem fecerit? Ergone post ingressum Solis Iustitiæ, in sua intima ardenti sufficit Leoni, eidemq; Doctori SS. quia sublimior cæteris ita præluceat astris? Phœbeis flammeis ignibus super Firma- mento Seraphicæ Religionis? minimè en cui igneus vigor inest, maximā pollens activitate, consequens antecedit Signum illius Virginis, quæ terras ab unione veræ fidei avulsas, luciq; Supernæ rebelles deferens, in Cœlo Seraphi- co protunc locum fixa securum Astræa Divinior Supremi Regnatoris Sponsa, palmari hanc velocissimus præcurrere passu, semper ubiq; contra ire, auden- tior Leo Defensor potentissimus. Hæc ausus heroici, tantæq; dexteritatis gra- tissima Regio quā fulget amicta Syrmate, investit eundem Sacro Novæ Du- ctorem Militiæ paludamento, Murice tegit & Ostro, ut esset pulchritudo & decor indumentum ejus, quò nimirum augustior Majestas tenebrarum alu- mnis horribilior æthereæ lucis in purpura emeretur. Dignentur ut libet Cœ- lestiū Indagatores titulis cognomineq; vario Signa obliquo sese vertentia or- dine? Leo hic nuper in Cœlo Seraphico mobilis, hætenus purpureā luce reful- get Cardinalis, vel ideò, quia super terram Militantis Filie Tonantis Antesigna- nus Albanensi culminat super meridiano Celsissimus, Purpurati honoris fasti- gio Eminentissimus; Ita undiquaq; luce adauctus maximā, quas in se Divini dotes animi robur & fortitudinem æstimavit, dilexit, Vicaria Numinis in ter- ris potestas, diū hæc probari luculento specimine non distulit. Nimirum contra tenebrarum opera, & cæcutientes ad æternæ veritatis lumen Alca- laphos ivit, ivit palam & apertè heros pro DEO, Fide, Religione, arma lucis in- ductus, ostenditq; animum fortissimus, qualem in alto non gemmis, sed justis pro Ecclesia fulgoribus, in Purpura corruscare decet. Tristi illā temporum nocte, quam sustinuit terrarum Princeps, Orbis amor, Gentiumq; Domina, enituit, ac illustrius apparuit Stellantis jubar Leonis, cui studium indefessum erat, omnimodè prospicere securitati, resq; dubias in tuto locare. Grande illud, verèq; Divinum subijt negotium instaurandæ pacis, nectendæ unionis Summus altitudinē heroici animi Mediator Orientem Occidenti conjunxit, medius inter utrumque. Abyssalis enim, quæ ex ore Altissimi prodijt Sapi- entia, in ore Leonis aurea Stella refulsit, cujus splendorem immensum Gym- merij tenebriones non potuere ferre, non aciem contra intendere, pallere juxta ac rubescere forti percussi radio, omnes trepidi, & Sacro horrore per- fusi, improba vota damnare caperunt. Alij tantum admirati in lumine Nu- men, instante Leone acerrimo propugnatore, deditis in obsequium fidei ani- mis,



mis, Victtricem adoravêre Deam. Si Lugdunensi Præsidentem Concilio memi-  
nisse juvat, ita ab eo cuncta sunt gesta, ut Sole clarius collustrantis agenda,  
nihil magnitudini animi, nihil constantiæ & fortitudini, nihil consiliorum  
sublimitati addi potuisse, ipsa invidia tantam exobscurare lucem impotens  
obstructis faucibus fateretur.

Stupuit in Seraphico quondam Conspicius Cœlo Sol Aquinaticus, Leo-  
nem Divinis radiare flammis, cum quo toties amico convenire solebat, lumi-  
ne adinvicem conferre, quæ in utroq; eminebant, Signo Sanctitatis expressa.  
Contigit, cum Leo primi Minorum Principis astrorum viam signaret, cursum-  
quæ sub Finitore vitæ mortalis, quem Cosmico absolverat motu, Sol ille re-  
trocessit continuò, ne Sanctum imperantis impediret laborem. Surgens ab  
Occiduis Iberiæ finibus lux clarissima gemini Sideris, quod Divinus conjun-  
xit amor, verius quam mutuis amplexibus stringere sese videntur Fratres  
Helenæ Lucida Sidera. Geminatum hunc fulgidi splendorem atri quis meli-  
us imitari, verâ laudum claritate prosequi potuit, quam Leo Divorum Cultui  
addictissimus. Utq; FRANCISCVM ANTONIVS, sic ANTONIVM BO-  
NAVENTVRA sequentia Signa vicissim mutuis sese collustravêre flammis,  
Lumenq; priori, posterior commodabat demonstrativum, quò magis uterq;  
inclaruisset Orbi. Astrum hoc fulgentissimum, Luce quâ superstes inclaruit,  
maximè in linguam delisse facundam declaravit, quâ Cœli adusq; Seraphici  
enarrant gloriam DEI. Neminem later, Astra vitam animamq; infra Lunam  
positis ministrare, eademq; cooperari naturæ causis. Hoc non extra miracu-  
lum, vitâ functis factorum vi pulsam gelido cadaveri reddere animam, inquæ  
corpus emortuum vitæ spiraculum reducere: Quis hæc potuit, ni DEVS ille  
fuerit? Potuit Leo Thaumaturgus, quia in eo Fons Vitæ sedem posuit. Pur-  
puratus hic lucentis splendor, & apex Leonis, fulgorq; Divinus, quia in Ve-  
stro cernitur Eminentissimus Olympo, Seraphici clara quotquot micatis Side-  
ra Poli. Vobis exindè surgit maximus honor & gloria, tantæqvè felicitatis  
munus, hodiè totus gratulatur Orbi. Signum hoc quòdli tantoperè beni-  
gno gratiarum influxu faveat terris? quantò Vobis proximis ignibus pariter  
in Firmamento Seraphico à Patre Luminum accensis præstet? non est recen-  
sere humanum. Verùm tandiù mortalis umbram Eloquij spargere licuit,  
quandiù à terrarum finibus cellius elevari visus, qui jam summum tenere  
Cœlum devoto observatur affectu Leo, & cum in Supremo Cœli Seraphici  
Culmine meridiat, Divinis evectus honoribus, extinguit omnem, nullamquæ  
patitur umbram lucis suæ comitem. Ergò libens, eoq; felicior immensitate  
Sacri fulgoris obruitur umbratilis facundia, cum hîc omne lucidum dispare-  
at, quodnam obscurum fandi genus crescet multitudine verborum, ut debi-  
tas plus ultra assurgat in laudes. Quare fave benigno gratiarum Lumine,  
labentibus succurre rebus Polonis, hætenus in turbido sortis sinistra po-  
litis, dextrum Sidus appare. Frange radio forti omne robur mali, quod  
ab Aquilone contra innocentem Aquilam venit, afflictis sponde  
cuncta bona ventura.

D I X I.



## ODE VOTIVA

*Ad Magnum Christiani Orbis Patronum.*

**D**ive quem pulchræ renitentis Auctor  
Lucis æternus, Iubar elevatum  
Extulit terris, sociavit Astris

Luminis auge.

Axe Cœlesti positus videris  
Aureum Sidus radiare, flammæ  
Principes inter, Leo Dux, coruscis  
Ignibus ardens.

Debito Magnum colimus Te honore,  
Supplicum votis faveas, precamur,  
Gemmeos Cœlo riguo Patrone

Funde super nos

Gratiarum imbres. Populus ruentis  
Imperij rebus petit, ut beatis  
Sedibus celsus meliora mittas

Tempora ab alto.

Iam satis nostras mala ad usq; terras  
Aggravant, quæ nunc querimur gementes  
Mole sub tanta: scelus expiandi

Suscipe partes.

Quod dabit Summus Tibi Rex Deorum  
Spe bonâ, tandem venias micante  
Luce candentes humeros amictus

Augur Apollo.


Verte stellatam faciem refulgens  
Ad laborantem Arcton, & arduis fer  
Rebus ad præsens placidus Polonis

Sidera dextra.


Sanctiori Tu rutilans Olympo,  
Turbidum Cœlum Lechiæ serena;  
Componas motus, Tonitruq; belli  
Poscimus aufer.



ts  
e.  
M  
o-  
m  
o  
es  
er  
ne  
a-  
ut  
o  
e-  
y-  
ri-  
e-  
n  
o.  
e









22000,-

3.XII.13



**Bibliotheca**  
**P.P. Camaldulensium in Bielany**

Depozyt w Bibliotece Jagiellońskiej



02350



